

2 Timoti

Nauəuə iətəm tatol keiu lan iətəm Pol təmətei tuvən kəm Timoti Nəghatiən əkuəkir rəha nauəuə u 2 Timoti

?Pəh təmətei nauəuə u? Aposil Pol təmətei nauəuə u.

?Təmətei tətuvən kəm pəh? Təmətei tətuvən kəm Timoti. Kəni in molkeikei məmə ilah min əpəha e niməfaki rəha Efəsis, məmə okotafin. Afin e “Nəghatiən Əkuəkir Rəha Nauəuə u 1 Timoti” o nəhrunian məmə Timoti in pəh.

?Natigiən təhro lanu lan nian təmətei? Nian kəpmən rəha Rom tətəskəlīm Pol əpəha Rom, in təsatigiən e kaləpus, mətəu in təmətətig e rəhan kəti nimə, kəni soldia min kəmautatig ilah min mauteruh vivi məmə in otəsəgimian. Naunun jəptə rəha Uək Min tətəghati e nian min əha. Kəni əmeiko kəpmən təmahlī pətigəm in, kəni taliuək əmə mətən o nu keiu. Mətəu rəueiu əha, tinuvən min e kaləpus əpəha Rom, kəni kaləpus əha in tərəh pəhriən ikīn. Nauəuə rəha Uək Min təsəghatiən e nian əha, nauəuə tinol naunun rəkis. Kaləpus əha in tətəpu ikīn, kəni tiəkis o nətəmimi o nuvənian məsal=pən lan. Luk əmə ilau min. Pol təmolkeikei məmə Timoti otuva meh mətəu-inu in rəhan niəli təuvir. Kəni in molkeikei məmə Timoti in otəmki nauəuə min rəhan.

?Təmətei nauəuə u o nak? Pol təməhrun məmə otəsuvəhiən kohamu in timis. Tol lanəha, in təmətei nauəuə u o nələhu-pəniən niməfaki e

nəhlmi nətəmi asoli pisin min nəuvein təhmen e Timoti. Nian iəkis min kəutəhuva o niməfaki, kəni Pol in tolkeikei məmə Timoti otətəkəlim Nanusiən Təuvir, kəni matəhtul əskasik e nəhatətəin rəhan, kəni məsəginian e nəni pətigəmiən Nanusiən Təuvir, kəni in otəhtul maru o nətəuiən nəhməiən e nipətin nəmə nərahian otuva.

Pol təməni təuvir kəm Timoti

¹ İəu Pol, u iəu aposil kəti rəha Krısto İesu, iətəm Uhgın təmitəpin rəkis iəu məmə rəhan, kəni mahli=pa iəu məmə iəkəni pətigəm rəhan nəniəskasikiən rəha nəmiəgəhian itulin e Krısto İesu.

² İətəni təuvir kəm ik Timoti, nətik iətəm iəkolkeikei pik ik.

Pəh Uhgın Tatə mine Krısto İesu rəhatah İərmənig okuəfinə rəhalau nəuviriən, mine nasəkəhruiən, mine nəməlinuiən kəm ik.

Pol təməfəri nətəligiən rəha Timoti

³ Nian rəfin lapin mine lənian, iətəfaki ohnik, kəni mətəni tagkiu kəm Uhgın ohnik. Kəni iatol uək rəhan təhmen=pən əmə e tipik min, kəni iəkəhrun məmə noliən tərəh kəti təsatigian lak.

⁴ Nıkkik tətəhti nəhu nəhmtəm, kəni iəkolkeikei pik məmə iəkeruh min ik pəh nıkkik otagiən.

⁵ Nıkkik tətəhti nəhatətəiən pəhriən rəham iətəm təhmen=pən əmə e nəhatətəiən iətəm təmaupən mətatig e rəham kəha Lois mine rəham məmə İu-nis, kəni iəkəhrun pəhriən məmə rəueiu in tinatig lam.

⁶ Kəni tol lanəha, iətəni mīn kəm ik məmə onəkəlel nīgəm rəha nəsanəniən iətəm Uhgīn təməfinə o nolien rəhan uək. Uhgīn təməfinə nəsanəniən əha nian iəmələhu=pən nəhlmək mətəfaki=pinə lam.

⁷ Ol uək e nəsanəniən əha, mətəu-inu Uhgīn təsəfaiən kəm tah nīkin rəha nəginien, mətəu təməfa nīkin rəha nəsanəniən, mine nīkin rəha nolkeikeiən, mine nīkin iətəm tatol nolien mīn iətəm in təhrun məmə kotəhruahru.

⁸ Kəni inəha, saulisien o nəni pətīgəmiən Iərməniḡ, kəni saulisien lak iətəm iətətiḡ e kaləpus o nərgin. Iətətəu nahməiən o nanusien təuvir, kəni nəmə nian əskasik tətuva ohnik, nəkəkeikei mol məmə iəu mine e nəsanəniən iətəm Uhgīn tətəfinə kəm ik.

⁹ Uhgīn təmosmiəḡəh itah kəni mauin e tah məmə kitah okəhuva rəhan mīn nətəmimi nətəm kotasim, kəni təməsolien o nati kəti iətəm kitah kəmotol, mətəu in təmöl e rəhan aru əmə nətəliḡien, mine nəuviriən. Nian Uhgīn təməsol əhanəhiən niftəni mine, mətəu in təmələhu rəkis nəlpəkəuiən məmə in otəfən rəhan nəuviriən kəm tah e Kristo Iesu,

¹⁰ mətəu rəueiu, in təmöl əpu nəuviriən əha kəm tah e nuvaiən rəha Iosmiəḡəh rəhatah, Kristo Iesu. Kəni Kristo təmohəpis nīmisiən mine rəhan nəsanəniən, kəni təmasiəḡəpin mol əpu suaru rəha nəmiəḡəhiən u naunun tikə, kəni kitah kauteh e nanusien təuvir əha.

¹¹ Kəni Uhgīn təmitəpin iəu məmə iəu iəḡəhati, mine aposil, mine iəḡətun o nanusien təuvir əha.

¹² Tol lanəha iətətəu pik nahməiən ohni u ikinu e kaləpus. Mətəu iəsaulisiən, mətəu-inu iəkəhrun məmə pəh u iətəhatətə lan, kəni məhrun vivi məmə in təhrun neh viviən nati nak iətəm in təmələhu=pa e nəhlmək o naunun nian.*

¹³ Itəu=pən əmə suaru rəha nəgətuniən u təhruahru iətəm iəməni kəm ik, kəni ol nati u e nəhatətəiən mine nolkeikeiən e Krīsto Iesu.

¹⁴ E nasiruiən rəha Narmīn Rəha Uhgīn iətəm tətatiḡ e nikitah, kəni ateruh vivi nati təuvīr iətəm Uhgīn təmələhu=pən e nəhlməm.

¹⁵ Nəkəhrun məmə rəhak mīn nətəmimi əpəha Esiə, ilah Fukeləs mine Hermokenəs, ilah rəfin kəmotagim rəkis motəpəh iəu.

¹⁶ Pəh Iərməniḡ otasəkəhruin Onesiforəs mine rəhan mīn, mətəu-inu nian tepət təmasiru lak mətəfəri rəhak nətəliḡiən. Kəni təməsaulisiən məmə iəmətatiḡ e kaləpus.

¹⁷ Nipəhriəniən, nian in təmuva Rom, təməsəl pik lak mətəuarus meruh iəu.

¹⁸ !Pəh Iərməniḡ otasəkəhruin in e naunun nian! Ik nəkəhrun vivi natimnati təuvīr mīn iətəm təmōl kəm iəu əpəha Efəsis.

2

Soldia təuvīr rəha Krīsto Iesu

¹ Ik u nətik, pəh Uhgīn otol nīkim təsanən e nəuviriən iətəm tatsipən e Krīsto Iesu.

² Nəmətəu rəkis natimnati mīn u iətəm iəməgətun ik lan e nəhmti nətəmimi tepət. Kəni os rəhak

* **1:12** Suaru pišin o nəuhliniən fes 12b: “kəni məhrun vivi məmə in təhrun neh viviən nati nak iətəm iəu iəmələhu=pən e nəhlməm o naunun nian.” **1:14** 1Tim 6:20

nəghatiən mələhu=pən e nəhlmi nətəmimi nəuvein nətəm nətəni nıpəhriənien e lah, kəni ilah okotəhrun nəgətuniən nətəmimi nəuvein mın lan.

³ Nian nərahien otuva, mətəu əhtul əskasik kitah mın ik, təhmen e soldia təuvir kəti rəha Kristo Iesu.

⁴ E nian rəha nəluaginien, soldia kəti təsolien natinmati rəha nətəmimi əpnəpin əmə, mətəu tatol əmə uək rəha soldia mətəu-inu, in tolkeikei məmə rəhan iətəmi asoli rəha soldia mın, nıkin otagiən lan.

⁵ Kəni e nolien əhmen əmə lanəha, iətəmi tətaiu məmə in otol win, in otəkeikei mıtəu=pən lou mın rəha naiuien, mətəu nəmə təsolien, kəni in otəsosien nətəuiən rəha nol winien.

⁶ Təhruahru əmə mın lanəha məmə iətəmi tatol pıx uək e nasumiən, in otaupən məulək lan.

⁷ Ətəlig vivi e nati nak iətəni kəm ik. İərməniğ otasiru lam o nəhruniən nıpəti nəghatiən mın u.

⁸ Ətətəlig e Iesu Kristo u nəuaniləuis rəha Tefit, kəni Uhgın təmosmiəgəh in e nımisiən. Kəni inu nanusiən təuvir iətəni pətiğəm.

⁹ Kəni iətətəu nəhməien o nanusiən təuvir əha, kəni nıpəhriənien, kəməlis iəu e sen təhmen=pən məmə iəu iakləh kəti uə iohamu itəmi. Mətəu kəsəlisiən nəghatiən rəha Uhgın.

¹⁰ Tol lanəha, iətəhtul əskasik e nəhməien mın rəfin rəhak o nasiruiən e nətəmimi nətəm Uhgın təmıtəpin ilah, məmə in otosmiəgəh ilah e Kristo Iesu, kəni ilah okotətiğ e nəuviriən əhagəhəg rəha Uhgın, iətəm naunun tikə.

¹¹ Inu nəghatiən tətəni pəhriən məmə,

Okəmə kəhuva kətiəh e Krīsto e nīmisiən rəhan, kəni okotəmiəgəh mīn kitah mīn.

¹² Okəmə kautəhtul əskasik e nian əskasik mīn, kəni kitah okotarməniḡ mīn kitah mīn.

Okəmə kitah kotəniapīn lan, kəni in otəniapīn e tah.

¹³ Okəmə kitah kəsotoliən rəhatah nonauvīl, mətəu in tatol rəhan nonauvīl, mətəu-inu Uhgīn otəkeikei matol rəhan noliən nian rəfin.

Ioluək təuvir rəha Uhgīn

¹⁴ Natimnati mīn u, onəkəkeikei mətəni mətisiəmaru lan kəm rəham mīn nətəmimi. Əni əskasik kəm lah lanəha məmə, “Iatəni e nərgi Uhgīn məmə itəmah nəstorgəhuiən o nīpəti nəghatiən mīn.” Nərgəhuiən lanəha təsasiruiən e iətəmi kəti, mətəu tətərekin əmə nətəmimi nətəm kəutətəu.

¹⁵ Alkut əskasik məmə onəkuva ioluək təuvir iətəm nian Uhgīn tateruh rəham uək, in təhrun nəniən məmə, “Əuəh, nəmol təuvir,” kəni nəsaulisien o rəham uək, mətəu-inu nətəgətun əhruahru nəghatiən rəha nīpəhriənien.

¹⁶ Mətəu əpəh nəghatiən mīn u tol tanpən əmə iətəm kotərah məsotisiəiən Uhgīn, mətəu-inu nətəmimi nətəm kəutəghati lanəha, nəmiəgəhiən rəhalah tatuyən matuvən əmə o noliən mīn iətəm Uhgīn təməki lan.

¹⁷ Nəgətunien rəhalah in təhmen=pən əmə e nīməḡim pien iətəm tətəmahali matepət matol iahgin. Suah mil u kuol lanu lan, ilau u Haemeneəs mine Filitəs,

2:11 2Kor 4:11 **2:12** Mat 10:33 **2:13** Rom 3:3-4; Tait 1:2

2:14 1Tim 6:4; Tait 3:9 **2:15** 1Tim 4:6 **2:16** 1Tim 4:7 **2:17**

1Tim 1:20

18 iätəm kinəmkarəpən rəkis e suaru rəha nīpəhriənīən. Katuəni məmə Uhgīn təmōl itah kotəmiəgəh mīn rəkis e nīmisiən, kəni ko Uhgīn təsəfa mīniən nīpətītah vi nīan Iesu tuva mīn. Kəni suah mīl u kətuərəkīn nəhatətəiən rəha nətəmimi nəuvein.

19 Mətəu tol pau lanəha, nīmə iätəm Uhgīn tatuvləkīn tətəhtul tiəkis, kəni təmətēi=pən lan məmə, “Iərmənīg təhrun nətəmi mīn u rəhan mīn,” mīne, “Nətəmi mīn u kəutəni məmə ilah nətəmimi rəha Iərmənīg okotəkeikei motəpəh nolīən tərah mīn.”

20 Ətəlig-to lan. E nīmə rəha iätəmi rəhan nautə tepət, kətīm pīsīn pīsīn mīn tepət. Kəməu nəuvein e nīmanīviuv təuvīr agīn. Kəməu nəuvein e nīmasiə mətə.* Uək rəha kətīm vi, in uək asoli iätəm katisiai. Kəni uək rəha kətīm əuas, in uək əpnəpīn əmə iätəm tol naulisiən təhmen əmə o nosiən nīmənərik.

21 Okəmə iätəmi kəti tatol rəhan nəmiəgəhiən tətəhlan vivi mətəpəh nolīən rəha naulisiən, in təhrun nolīən uək asoli iätəm katisiai, kəni Uhgīn otələhu kalīn məmə rəhan pīsīn əmə, kəni mol əpenə-penə məmə otol uək təuvīr mīn.

22 Aiu muvən isəu o nolīən tərah mīn iätəm tateviə e nīki nətəm aluə. Kəni itəu=pən vivi suaru rəha natimnati mīn u: nolīən iätəm təhruahru, mīne nəhatətəiən, mīne nolkeikeiən, mīne nəməlinuiən. Itəu=pən suaru əha itəmah

2:19 Nam 16:5; Aes 52:11; Jon 10:14; 1Kor 8:3 * 2:20 Nəghatiən əhruahru rəha Kris tətəni məmə, “E nīmə rəha iätəmi rəhan nautə tepət, pīlet pīsīn pīsīn mīn tepət. Kəmōl nəuvein e aiən u kol tətəraip-oraip, nəuvein e silfə, nəuvein e nigī, nəuvein e nīftəni.”

nətəmi mɪn u nətəm kautətapuəh o nasiruiən rəha Iərmənig e nɪkɪlah iətəm təuvɪr.

²³ Əpəh magim rəkis e nəghatiən alməli mɪn iətəm nɪpətɪlah tɪkə. Nəghatiən mɪn əha kautiuvi=pa əmə norgəhuiən.

²⁴ Ioluək rəha Iərmənig, ko in təsorgəhuiən, mətəu in otəkeikei matol təuvɪr kəm nətəmimi rəfin, kəni otəkeikei muva iətəmi rəha nəgətuniən, kəni rəhan nətəligiən təfəməh.

²⁵ Okəmə nətəmimi nəuvein kəutəni rah rəhan nəgətuniən, kəni in otəkeikei məgətun vivi ilah e nolien mətig əmə. Kəni nəmə təhro Uhgɪn otegəhan məmə ilah okotəuhlin rəhalah nəmiəgəhiən, məmə ilah okotəhrun nɪpəhriənien.

²⁶ Kəni ilah okəhuva mɪn e nətəligiən təuvɪr, kəni motagim rəkis e lalig rəha Setən, iətəm təmaskəlim ilah kəni kautol nəuiən.

3

Nolien tərah mɪn iuəkɪr o Naunun Nian

¹ Mətəu onəkəkeikei məhrun nəghatiən u məmə nian əskasik mɪn okəhuva iuəkɪr o Naunun Nian.

² Tol lanəha mətəu-inu, nətəmimi okautətəlig aru əmə e lah mɪn, kəni ilah okotolkeikei pɪk məni. Nətəmimi nətəm kəutəni aru əmə nati, məutəfu aru ilah mɪn, məutəni rah nətəmimi mine Uhgɪn, məutəhti nəuia tatə mine məmə, məutəpəh nəniən tagkiu e nɪkɪlah, kəni okəsotisiaiən Uhgɪn.

³ Rəhalah nolkeikeiən otarfu, məsotaluiən e nərahien kəti okol e lah. Okəsotarmənigiən e nolien mɪn rəhalah. Nɪkɪlah otagiən o nərəkiniən

nətəmimi mine nərgilah. Okotəməki e nati iətəm təuvir.

⁴ Ilah kəuit kəsua min, kəni okotol natimnati tərəh nəuvein mətəu kəsotətəligiən məmə nati nak otiet lan. Kəni ilah okotəfəri aru ilah, kəni ilah okotolkeikei pik natimnati o nətəuiən təuvir e nīpətīlah, mətəu ilah okəsotolkeikeiən Uhgīn.

⁵ Okotol noliən min rəha nəfaki min məmə nətəmimi okoteruh, mətəu ilah okəsotolkeikeiən məmə nəsanəniən rəha Uhgīn otəuhlin nīkilah. Uvən isəu o nətəmimi min u.

⁶ Əpəh əmə ilah mətəu-inu nəuvein kauteh suaru o nuvəniən lahuənu min, kəni mautiuvi rəkis nətəligiən rəha nīpətan nətəm rəhalah nətəligiən təsəskasikiən. Təfagə tərəh min rəha nīpətan min u, in tiəkis pik o lah, kəni noliən tərəh min tepət iətəm ilah kautolkeikei, kautiuvi=pən ilah.

⁷ Kəni nīpətan min əha kautətəlig vivi e nəghatiən min rəfin rəha nətəmi min əha, mətəu ko kəsotəhruniən nəghatiən rəha nīpəhriəniən.

⁸ Aupən ikīn, Janes mine Jampres kəmətuəməki e Mosis,* kəni e noliən əhmen əmə lanəha, nətəmimi min əha kautəhti nəghatiən rəha nīpəhriəniən. Nətəmimi min u, rəhalah nətəligiən təriəuəh e noliən tərəh min, kəni noliən rəha nəhatətəiən rəhalah in neiuəiən əmə in əmə.

⁹ Mətəu nəgətuniən eiua rəhalah, ko təsəhtuliən tuvəh, mətəu-inu nətəmimi rəfin okoteruh məmə ilah kəsotəhruniən nati iətəm kəutəghati lan, kotəhmen=pən əmə e suah mil əha.

3:5 Mat 7:15,21; Tait 1:16 * **3:8** Janes mine Jampres, ilau iəmki nərik mil rəha kig rəha Ijip. Nərgilau tikə e Nauəuə Rəha Uhgīn, mətəu ilau əha ikīn e nauəuə pisin min rəha nətəm Isrel. **3:8** Eks 7:11

Nəghatian rəha Pol kəm Timoti

¹⁰ Mətəu ik, Timoti, ik nəmətəu=pən rəhak nəgətuniən, mine noliən rəha nəmiəgəhiən rəhak, mine nati nak iətəm iəkolkeikei məmə iəkol, mine rəhak nəhatətəiən, mine noliən rəha nətəligiən rəhak iətəm təfəməh, mine rəhak nolkeikeiən, mine nəhtul əskasikiən rəhak,

¹¹ kəni nəkəhrun nian əskasik mən iətəm tətəuva e rəhak nəmiəgəhiən, mine noliən tərəh mən iətəm katol lak. Kəni nəkəhrun noliən əskasik mən iətəm kəmol lak əpəha Antiok, mine Ikoniam, mine Lистра. Mətəu İərmənig təmos rəkis iəu e natimnati mən rəfin əha.

¹² Nipəhriənien, nətəmimi rəfin nətəm kətolkeikei məmə okətol noliən iətəm Uhgən tolkeikei, kəni mətol e Kristo İesu, nətəmimi okətol tərəh kəm lah,

¹³ mətəu nian kətiəh mən əmə, nol təfagə tərəh mən mine nətəmimi rəha neiuəiən,[†] ilah okətol noliən tərəh məhuvən mətol nətəm kotərəh agin. İlah nətəm kəteiuə e lah,[‡] kəni ilah okəteiuə pik agin e nətəmimi.

¹⁴ Mətəu ik, Timoti, onəkeikei mətətəu=pən əmə natimnati təuvir mən iətəm kəməgətun ik lan nətəm nəməni əskasik rəkis nipəhriənien lan, mətəu-inu

3:11 Uək 13:50; 14:5; 14:19 **3:11** Sam 34:19 **3:12** Mat 16:24; Jon 15:20; Uək 14:22 † **3:13** “nətəmimi rəha neiuəiən” — Nipətin məmə ilah nətəmimi nətəm kəutəni məmə ilah kəutol nati kəti məmə okəteiuə e nətəmimi nəuvein. İnu təhmen e nətəmimi nətəm Pol tətəni kəm Timoti. İlah kəutəni məmə ilah nəgətun mən rəha niməfaki, mətəu kəpə, kəuteiuə. Səniəmə rəha niməfaki. Kəutəni əmə rəhalah əmə nətəligiən mən məmə okəteiuə e nətəmimi. ‡ **3:13** Setən uə nətəmimi pisin mən okəteiuə e lah.

ik nəkəhrun vivi nətəmimi nətəm kəmotəgətun ik lan.

¹⁵ Kəni nian nəmatəkəku mətəuarus=pa u rəueiu, nəməhrun Nauəuə Rəha Uhgīn iətəm təhrun nəfinəiən neinatigiən məmə nəkəhrun nosiən nəmiəgəhiən itulīn lan o nəhatətəiən e Kristo Iesu.

¹⁶ Nəghatiən mīn rəfin e Nauəuə Rəha Uhgīn, kəmotəsiən əmə e nohli Uhgīn, kəni kəutasiru e tah. Kəutəgətun itah natimnati tepət. Mautəni əpu noliən tərəh mīn rəhatah, mautəgəu əhruahru itah, kəni məutəgətun itah e noliən mīn iətəm kotəhruahru.

¹⁷ Kautol əpenə-penə itah u nətəmimi rəha Uhgīn məmə kitah kəhuva nətəmimi nətəm kotəhrun noliən uək təuvir mīn rəfin.

4

¹ Timoti, oiəkəni=piənə nəghatiən keikei kəti kəm ik e nəhmti Uhgīn mīne Kristo Iesu iətəm otakil noliən rəha nətəmimi rəfin, nətəm kautəmiəgəh mīne nətəm kəmoħmīs, kəni oiəkəni=piənə nəghatiən u mətəu-inu in otuva mīn mətarməniġ. Kəni inəha, iətəkeikei mətəuvahag əskasik mətəni kəm ik məmə,

² əni pətigəm nəghatiən rəha Uhgīn, kəni əhtul maru o nəni pətigəmiən, nati əpnəpiən məmə otimətig əmə, uə tiəkīs. Uhalpiən nati məgəu əhruahru noliən rəha nətəmimi, əniəhu noliən tərəh rəha nətəmimi, kəni məuvahag məfəri nətəligiən rəha nətəmimi. Kəni nian natol uək mīn

u, rəham nətəligiən otəkeikei məfəmäh, kəni rəham nəgətuniən otəkeikei məhruahru vivi məuvir.

³ Nəkəkeikei mol lanəha mətəu-inu, nian iətəm tətuvə, nətəmimi okəsotolkeikeiən məmə okotətəlig e nəghatiən pəhriən. Mətəu nikilah əmə otit ilah mīn, kəni ilah okotos iəgətun pişin pişin mīn motolkeikei məmə nəgətun mīn okotəhli matəlgilah motəgətun nəghatiən mīn iətəm ilah əmə kotolkeikei.

⁴ Kəni ilah okotəuhlin nīmatəlgilah o nətəligiən e nəghatiən pəhriən, kəni məhuvən mətətəlig e nonagei eiüə mīn.

⁵ Mətəu ik, ateh vivi rəham nətəligiən mīne rəham nolien mīn e nian mīn rəfin, nati əpnarīn nati pişin pişin mīn kəutəhuva e rəham nəmiəgəhiən, kəni əhtul əskasik nian nərahien tətuvə, kəni uvən məni pətigəm nanusiən təuvir, kəni ol rəfin uək iətəm Uhgīn təməfinə kəm ik məmə onəköl.

⁶ Timoti, ol natimnati mīn əha, mətəu-inu otəsuvəhiən, iəu iəkimis. Kəni rəueiü nəmiəgəhiən rəhak təhmen e wain iətəm kīnatiüvi=pən e oltə məmə okol sakrifais lan.*

⁷ E rəhak nəluəgīniən təuvir rəha nəhatətəiən, iəmatu vivi e nəhlmək, kəni e rəhak naiüiən, iəu iəmaiü vivi rəkis mətəuarus=pa naunun naiüiən, kəni iəu iəmətaskəlīm vivi nolien əhruahru rəha nəhatətəiən kəni iəməsəpəhiən uək rəha nəni pətigəmiən nanusiən təuvir.

4:3 1Tim 4:1 **4:6** Fil 2:17 * **4:6** Nian nəuvein, nian nətəm Isrel kautol naunun e lafet, kəni mətauvəregin wain məmə kautol sakrifais lan tətuvən kəm Uhgīn. Təsuvəhiən nəmiəgəhiən rəha Pol tol naunun, kəni in təmāni məmə nəmiəgəhiən rəhan təhmen e wain u tatol naunun e lafet lan. **4:7** 1Tim 6:12

⁸ Kəni rəueiu, Iərmənig iətəm rəhan nakiliən təhruahru vivi, in təmol əpenə-penə e nətəouiən rəhak, inu kəfəfau rəha iətəm tatol win e rəhan naiuiən, kəni in otəfəfau=pa kəm iəu e nian rəha nakiliən mətəu-inu in təmakil iəu məmə rəhak nəmiəgəhiən təhruahru. Kəni səniəmə iəu pişin əmə, mətəu otəfən kəm nətəmimi rəfin nətəm kətolkeikei mautəhtahnin məmə in otuva min.

Pol təmāni pətigəm nanusiən rəha in min nəuvein

⁹ Əsal uəhai əmə rəham suaru məmə onəkuva meh iəu,

¹⁰ mətəu-inu Timəs, u tolkeikei pik nati rəha niftəni u, in tinəpəh iəu minuvən Təsalonaikə. Kresens tinuvən rəkis Kəlesiə, kəni Taitəs tinuvən rəkis Talmesiə.

¹¹ Mətəu Luk pişin əmə itimlau min. Təuvir məmə nian nətuva, onəkit Mak itəlau min, mətəu-inu in təhrun nasiruiən e uək rəhak.

¹² İəmahli=pən rəkis Tikikəs tuvən əpəha Efəsis.

¹³ Kəni nian nəkuva, onəkos rəhak kot iətəm iəmələhu kəm Karpəs əpəha Troas, kəni onəkos min rəhak nauəuə min iətəm kəmaiu-aiu,† kəni iəkolkeikei pik min məmə onəkos nauəuə min u kəmol e nilosi sipsip.

¹⁴ Suah u Aleksantə u iətəmimi rəha noliən uək e aiən, in təmatol tərəh lak. Iərmənig otəfən nıtai nətəouiən rəhan o natimnati min əha.

¹⁵ Kəni ik min, atətəu ik o suah konu, mətəu-inu tətəhtipəsig e nəghatiən min rəhatah.

4:8 1Kor 9:24-25 **4:11** Uək 15:37-39; 2Kor 8:23; Kol 4:14 † **4:13** E nian əha, nauəuə rəfin kəmaiu-aiu. Kotos mapepe əfəməh kəti kəni kəmaiu-aiu. **4:13** Uək 20:6 **4:14** Aes 59:18; Rom 2:6

16 Nian iəmaupən məhtul e kot məmə iəkəni pətigəm nəghatiən mīn rəhak, suah kəti təməsəhtul pətigəmiən masiru lak, mətəu nətəmimi rəfin kəmotagim motəpəh iəu. Pəh Uhgīn nīkin otəsəhtiən natimnati rəfin iətəm ilah kəmotol.

17 Mətəu İərməniğ təməhtul e nīkalik məfa nəsanəniən kəm iəu məmə iəkəni pətigəm vivi nəghatiən rəhan, kəni pəh Nanihluə‡ mīn okotətəu. Kəni təmləfətigəm iəu e nohli laion. §

18 İərməniğ otos rəkis iəu e nərahian mīn rəfin iətəm okol kəm iəu, kəni in otaskəlīm vivi iəu, kəni mos iəu iəkuvən e negəu e neai, ikin tətərməniğ ikin. Pəh okətəfəri nərgin tatuvən matuvən nautun tikə. Əuəh.

Naunun nəghatiən

19 İatəni təuvir kəm Prisilə mīne Akuilə, mīne Onesiforəs mīne rəhan mīn.

20 Erastəs təməsitəu=paian iəu, in əpəha Korən. Kəni nian iəmiet Maelitəs, mupəh Trofiməs tətətiğ mətəu-inu in tatimis.

21 Alkut pik məmə nəkuva uəhai əmə u ikinu, uərisiğ nian rəha nətəpuian. İupuləs tətəni təuvir kəm ik, kəni Putens, mīne Linus, mīne Klotiə, mīne piatah mīn rəfin u ikinu kəutəni təuvir kəm ik.

22 Pəh İərməniğ tətətiğ itəlau min. Pəh Uhgīn otəfinə rəha nəuviriən kəm təmah.

‡ 4:17 Nanihluə, İanihluə – Afın-to e tiksınəri. § 4:17 Nəghatiən mīn nəuvein e fes mīn 9-17, təhmen əmə e nəghatiən mīn nəuvein e Sam 22. 4:19 Uək 18:2; 2Tim 1:16-17 4:20 Uək 19:22; 20:4; Rom 16:23

Nauəuə Asim Rəha Uhg̃in Nəmtət̃iən Vi
The New Testament in the Whitesands language of
Tanna Island, Vanuatu
Niutesteman long Nərak, lanwis blong Whitesands
Tanna, Vanuatu

Copyright © 2014 Wycliffe Bible Translators, Inc.

© Wycliffe Bible Translators, Inc.

Language: Whitesands

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

PDF generated using Haiola and XeLaTeX on 18 Apr 2025 from source files dated 31 Aug 2023

913a182a-255f-5344-b6b0-0294ba221e87